

## Кусыпъёсмес юнматон вылысь

Удмурт Элькунысь Йёскалык библиотекаысь йёскалык но шаертон литературая но библиография ёзэт «ВКонтакте» мерлыко вотэсэ потйз. Табере «Центр национальной и краеведческой литературы» (<https://vk.com/okful>) группаын нуналлы быдэ тунсыко иворъёс пото. Татысь өнерчиос Удмурт Элькунын потэм но солэсь улонзэ пöртэм ласянь возьматйсь книгаосын, азьвыл арьёсы печатлам шер пумиськылйсь изданиосын тодмато.

Группае потйсь иворъёс дуннеысь но кунысьтымы тодмо адымиосты, учыръёсты яке календарьысь датаосты асьме удмурт шаерлэн улонэныз герзало, удмурт литератураен но лулчеберетэн тодмато. Со сяна, группаын отделэн но библиотекаен радъям тунсыко ужрадъёс сярсы иворъёсты шедьтыны луоз.

*Лариса Александровна ДМИТРИЕВА,  
Йёскалык библиотекаысь өнерчи*

## Семён Самсоновлы сйзем лыдзöнъёс

1994-тй арысен кутскыса, котькуд ар куарусён толзэе милям ёросамы Семён Александрович Самсоновлы сйзем лыдзöнъёс ортчо. Туэ та лыдзöнъёс 23-тйзэ радъяськызы ини. Котьку сямен ик соос кутскызы 1-тй куарусёнэ, Удмуртиысь калык писательлэн вордйськем нуналаз. Ёрос но гурт лыдзетъюртъёсын, школаосын С.А. Самсоновлы сйзем урокъёс но литературной часъёс радъяськызы. Толзэе ёже дышетскись пинальёслы литература но шаертонъя «Бадзым Самсонов шудонъёс» ужрад ортчиз. Соос сйземын агай-вынъёслэн Андрей но Владимир Самсоновъёслэн котырес лыдпус тырмемзылы. Нош нырысетйез «Бадзым Самсонов шудонъёс» ужрад ортчиз туэ, 2-тй южтолзэе.



Отчы пыриськызы ёросысьтымы 5–8-тй классъёсын дышетскись пинальёс. Командаослы люкиськыса, соос ёросмылэсь историзэ но Самсонов писательёслэсь гожтэм произведениоссэс тодэмзэс возьматыса, визьзэс сыназы.

«Лыдзиськомы дэмен» аспöртэмлыко ужрад-акция ортчиз Иваново-Самарскысь лыдзетъюртын. Али гуртын кысык уж вакыт бере, лыдзисьёс ём дыръя лыдзиськон юртэ мыныны уг ваньмо, соос доры Самсоновъёслэн чеберлыко гожтосьёсынызы вуэ гуртысь библиотекарь. Таёе книгаен эшъяськон амал ваньмызылы кельше. 8-тй куарусёнэ акцилэн берпуметй нуналыз вал, ортчиз со лыдзетъюртын. Пинальёс тодматскызы Самсонов выжыкысь потэм писательёсын, Андрей Самсоновлэсь кылбуръёссэ чебер но вольыт лыдзöнъя вожвылъяськонэ пыриськызы.

21-тй куарусёнэ Баграш-Бигра гуртын кылбур лыдзöнлы сйзем «Выжылэсь юн кылёз ки бервыл» жыт-вожвылъяськон ортчиз. Жытбыт сцена вылын чузъяськызы Андрей но Владимир Самсоновъёслэн кылбуръёссы. Озы ик вожвылъяськонэ пыриськисьёс асьсэ гуртысь потэм авторъёслэсь – Александр Титовлэсь, Сергей Сосновлэсь но Анастасия Шумиловалэсь – произведениоссэс но лыдзыны өз вунэтэ. Та жытэ мылкыд карисьёслы ас кылбуръёсынызы тодматыны луонлык сюрис. Конкурсэ пыриськызы 40-лэсь ятыр улосчиос, самой пичиезлы кылбур лыдзисьлы 2 арес вал, нош мййезлы – 80 ареслэсь ятыр.

23-тй куарусёнэ Самсоновъёслэн Тыло гуртысь музей-усадыбаязы радъямын вал удмурт бард кырзаныя «Тылобурдо» II ёрос фестиваль. Та ужрадэ пыриськызы ёросысьтымы но элькунысьтымы 20 пала авторъёс, кудъёсыз гожъяло но кырзало удмурт кылын. Конкурсантъёсты дунъязы Тыло гуртысь Самсонов выжыкысь нырысетй удмурт бард Владимир Возняков, журналист но кылбурчи Семён Карпов.

Самсоновлы сйзем лыдзöнъёс арысь аре паськытало, соос пöрмо зэмос площадкалы, кудйз будэтэ но кыдатэ ёросысьтымы удмурт творческой интеллигенциез, сюрес сётэ выль удмурт кизилиослы.

*Людмила Геннадьевна ШУМИЛОВА,  
Пичи Пурга ёрос библиотекалэн директорез*